

古今說部林取書

第二集

二

實業學校用書

# 中國商業史

陳家錕編

書分三編。一從上古至周。爲商業發生及擴張時代。二自漢至明。歐人未東來以前。爲商業繁劇及衰落時代。三從明中葉。歐人東來至今。爲商業激動及進取時代。每編各分章節。略於古而詳於今。旁搜博採。舉要提綱。條理分明。詞意顯豁。書中多列表式。以醒眉目。教者學者。一覽瞭然。合於中等教科程度。凡商業家未入學校。而有志商業者。讀此亦能增進智識。獲益無窮。

洋裝一冊定價四角五分

中國圖書公司和記出版

海內十洲記

漢 東方朔

祖洲在東海

玄洲在北海

流洲在東海

聚窟洲在南海

瀛洲在東海

長洲在東海

生洲在東海

炎洲在南海

元洲在北海

鳳麟洲在東海

漢武帝既聞王母說八方巨海之中。有祖洲、瀛洲、玄洲、炎洲、長洲、元洲、流洲、生洲、鳳麟洲、聚窟洲。有此十洲。乃人跡所稀絕處。又始知東方朔非世常人。是以延之曲室。而親問十洲所在所有之物名。故書記之。方朔云。臣學仙者耳。非得道之人。以國家之盛美。將招名儒墨於文教之內。抑絕俗之道於虛詭之迹。臣故韜隱逸而赴王庭。藏養生而侍朱闕矣。亦由尊上好道。且復欲抑絕其威儀也。曾隨師主履行。比至朱陵扶桑蜃海冥夜之丘。純陽之陵。始青之下。月宮之間。內遊七丘。中旋十洲。踐赤縣而遶五岳。行陂澤而息名山。臣自少及今。周流

六天。廣陟天光。極於是矣。未若凌虛之子。飛真之官。上下九天。洞視百萬。北極勾陳。而并華蓋。南翔太丹。而棲大夏。東之通陽之霞。西薄寒穴之野。日月所不逮。星漢所不與。其上無復物。其下無復底。臣所識。乃及於是。愧不足以酬廣訪矣。

祖洲近在東海之中。地方五百里。去西岸七萬里。上有不死之草。草形如菰。苗長三四尺。人已死三日者。以草覆之。皆當時活也。服之令人長生。昔秦始皇大苑中多枉死者。橫道有鳥如鳥狀。銜此草覆死人面。當時起坐而自活也。有司聞奏。始皇遣使者齎草以問北郭鬼谷先生。鬼谷先生云。此草是東海祖洲上。有不死之草。生瓊田中。或名爲養神芝。其葉似菰。苗叢生。一株可活一人。始皇於是慨然言曰。可採得否。乃使使者徐福。發童男童女五百人。率攝樓船等入海。尋祖洲。遂不反。福道士也。字君房。後亦得道也。

瀛洲在東海中。地方四千里。大抵是對會稽。去西岸七十萬里。上生神芝仙草。又有玉石。高且千丈。出泉如酒。味甘。名之爲玉醴泉。飲之數升。輒醉。令人長生。

洲上多仙家。風俗似吳人。山川如中國也。

玄洲在北海之中。戊亥之地。方七千二百里。去兩岸三十六萬里。上有太玄都。仙伯真公所治。多丘山。又有風山。聲響如雷電。對天西北門。上多太玄仙官宮室。宮室各異。饒金芝玉草。乃是三天君下治之處。甚肅肅也。

炎洲在南海中。地方二千里。去北岸九萬里。上有風生獸。似豹青色。大如狸。張網取之。積薪數車以燒之。薪盡而獸不然。灰中而立。毛亦不焦。斫刺不入。打之如灰。囊以鉄鎚。鍛其頭數十下乃死。而張口向風。須臾復活。以石上菖蒲塞其鼻。卽死。取其腦和菊花。服之。盡十斤。得壽五百年。又有火林山。山中有火光。獸大如鼠。毛長三四寸。或赤或白。山可三百里許。晦夜卽見此山林。乃是此獸光照。狀如火光相似。取其獸毛以緝爲布。時人號爲火浣布。此是也。國人衣服垢汚。以灰汁浣之。終無潔淨。唯火燒此衣服。兩盤飯間。振擺其垢。自落。潔白如雪。亦多仙家。

長洲一名青丘。在南海辰巳之地。地方各五千里。去岸二十五萬里。上饒山川。

及多大樹。樹乃有二千圍者。一洲之上。專是林木。故一名青丘。又有仙草靈藥。甘液玉英。靡所不有。又有風山。山恒震聲。有紫府宮。天真仙女遊於此地。

元洲在北海中。地方三千里。去南岸十萬里。上有五芝。玄澗。澗水如蜜漿。飲之長生。與天地相畢。服此五芝。亦得長生不死。亦多仙家。

流洲在西北海中。地方三千里。去東岸十九萬里。上多山川。積石。名爲昆吾。冶其石成鐵。作劍。光明洞照。如水晶狀。割玉物如割泥。亦饒仙家。

生洲在東海丑寅之間。接蓬萊十七萬里。地方二千五百里。去西岸二十三萬里。上有仙家數萬。天氣安和。芝草常生。地無寒暑。安養萬物。亦多山川。仙草衆芝。一洲之水。味如飴酪。至良洲者也。

鳳麟洲在四海之中央。地方一千五百里。洲四面有弱水繞之。鴻毛不浮。不可越也。洲上多鳳麟。數萬各爲群。又有山川池澤。及神藥百種。亦多仙家。煮鳳喙及鱗角。合煎作膏。名之爲續弦膠。或名連金泥。此膠能續弓弩已斷之弦。刀劍斷折之金。更以膠連續之。使力士擊之。它處乃斷。所續之際。終無斷也。武帝天

漢三年帝幸北海祠恒山。四月西國王使至獻此膠四兩。吉光毛裘。武帝受以付外庫。不知膠裘二物之妙用也。以爲西國雖遠而上貢者不奇。稽留使者未遣。又時武帝幸華林園射虎而弩弦斷。使者時從駕。又上膠一分。使口濡以續。弩武帝驚曰。異物也。乃使武士數人共對掣引之。終口不脫。如未續時也。膠色青如碧玉。吉光毛裘黃色。蓋神馬之類也。裘入水數日不沉。入火不燠。帝於是乃悟。厚謝使者而遣去。賜以牡桂乾姜等諸物。是西方國之所無者。又益思東方朔之遠見。周穆王時。西胡獻昆吾割玉刀。及夜光常滿杯。刀長一尺。盃受三升。刀切玉如切泥。盃是白玉之精。光明夜照。冥夕出盃於中庭。以向天。比明而水汁已滿於盃中也。汁甘而香美。斯實靈人之器。秦始皇時。西胡獻切玉刀。無復常滿盃耳。如此膠之所出。從鳳麟洲來。劍之所出。必從流洲來。並是西海中所有也。

聚窟洲在西海中申未之地。地方三千里。北接崑崙二十六萬里。去東岸二十四萬里。上多眞仙靈官。宮第比門不可勝數。及有獅子辟邪鑿齒天鹿長牙銅

頭銜額之獸。洲上有大山。形似人鳥之象。因名之爲神鳥山。山多大樹。與楓木相類。而花葉香聞數百里。名爲反魂樹。扣其樹亦能自作聲。聲如群牛吼。聞之者皆心驚神駭。伐其木。根心於玉釜中。煮取汁。更微火煎。如黑錫狀。令可丸之。名曰驚精香。或名之爲震靈丸。或名之爲反生香。或名之爲震檀香。或名之爲人鳥精。或名之爲却死香。一種六名。斯靈物也。香氣聞數百里。死者在地聞香氣。乃却活不復亡也。以香薰死人。更加神驗。征和三年。武帝幸安定。西胡月支國王。遣使獻香四兩。大如雀卵。黑如桑椹。帝以香非中國所有。以付外庫。又獻猛獸一頭。形如五六十日犬子。大如狸。而色黃。命國使將入呈。帝見之。使者抱之似犬。羸細禿悴。尤怪其不副也。問使者此小物可弄。何謂猛獸。使者對曰。夫威加百禽者。不必繫之以大小。是以神麟可爲巨象之王。鸞鳳可爲大鵬之宗。百足之蟲。制於騰蛇。亦不在於巨細也。臣國去此三十萬里。國有常占。東風入律。百旬不休。青雲千呂。連月不散者。當知中國時有好道之君。我王固將賤百家而貴道儒。薄金玉而厚靈物也。故搜奇蘊而貢神香。步天林而請猛獸。乘霧



車而濟弱。滯策驥足以度飛沙。契闊途遙。辛苦蹊路。于今已十三年矣。神香起天。殘之死疾。猛獸却百邪之魅鬼。夫此二物。實濟衆生之至要。助政化之昇平。豈圖陛下反不知真乎。是臣國占風之謬矣。今日仰鑒天姿。亦乃非有道之君也。眼多視則貪色。口多言則犯難。身多動則淫賊。心多飾則奢侈。未有用此四者而成天下之治也。武帝恧然不平。又問使者。猛獸何方而伏。百禽食噉何物。膂力何比。其所生何鄉耶。使者曰。猛獸所出。或生崑崙。或生玄圃。或生聚窟。或生天路。其壽不窮。食氣飲露。解人言語。仁慧忠恕。當其仁也。愛護蠢動。不犯虎豹。當其威也。一聲叫發。千人伏息。牛馬百物。驚斷絙繫。武士奄忽。失其勢力。當其神也。立興風雲。吐嗽雨露。百邪迸走。蛟龍騰驚。處于太上之廡。役御獅子。名曰猛獸。蓋神光無常。能爲大禽之宗主。乃攬天之元王。辟邪之長帥者也。靈香雖少。斯更生之神丸也。疫病災死者將能起之。及聞氣者卽活也。芳又特甚。故難歎也。於是帝使使者。令猛獸發聲。試聽之。使者乃指獸命喚一聲。獸舐脣良久。忽叫如天大雷。霹靂。又兩目如礪。碑之交光。光朗衝天。良久乃止。帝登時顛

蹶掩耳震動。不能自止。侍者及武士虎賁皆失仗伏地。諸內外牛馬豕犬之屬皆絕絆離繫。驚駭放蕩。久許咸定。帝忌之。因以此獸付上林苑。令虎食之。於是虎聞獸來。乃相聚屈積。如死虎伏。獸入苑徑上虎頭。溺虎口。去十步已來。顧視虎。虎輒閉目。帝恨使者言不遜。欲收之。明日失使者及猛獸所在。遣四出尋討。不知所止。到後元元年。長安城內病者數百。亡者太半。帝試取月支神香燒之於城內。其死未三月者皆活。芳氣經三月不歇。於是信知其神物也。乃更秘錄餘香。後一旦又失之。檢函封印如故。無復香也。帝愈懊恨。恨不禮待於使者。益貴方朔之遺語。自愧求李君之不勤。慙衛叔卿於措庭矣。明年帝崩于五柞宮。已亡月支國人烏山震檀却死等香也。向使厚待使者。帝崩之時。何緣不得靈香之用耶。自合命殞矣。

滄海島在北海中。地方三千里。去岸二十一萬里。海四面繞島。各廣五千里。水皆蒼色。仙人謂之滄海也。島上俱是大山。積石至多。石象八石。石腦石桂英流丹黃子石膽之輩百餘種。皆生於島石。服之神仙長生。島中有紫石宮室。九老

仙都所治。仙官數萬人居焉。

方丈洲。在東海中心。西南東北岸正等方丈。方面各五千里。上專是群龍所聚。有金玉琉璃之宮。三天司命所治之處。群仙不欲昇天者。皆往來此洲。受太玄生籙。仙家數十萬。耕田種芝草。課計頃畝。如種稻狀。亦有玉石泉。上有九源丈人宮。主領天下水神。及龍蛇巨鯢陰精水獸之輩。

扶桑。在東海之東岸。岸直陸行登岸一萬里。東復有碧海。海廣狹浩汗。與東海等。水既不鹹苦。正作碧色。甘味香美。扶桑在碧海之中。地方萬里。上有大帝宮。太真東王父所治處。地多林木。葉皆如桑。又有椹樹。長者數千丈。大二千餘圍。樹兩兩同根偶生。更相依倚。是以名爲扶桑。仙人食其椹。而一體皆作金光色。飛翔空立。其樹雖大。其葉椹故如中夏之桑也。但椹稀而色赤。九千歲一生實耳。味絕甘香美。地生紫金丸玉。如中夏之瓦石狀。真仙靈官變化萬端。蓋無常形。亦有能分形爲百身十丈者也。

蓬丘。蓬萊山是也。對東海之東北岸。周廻五千里。外別有圓海繞山。圓海水正

黑而謂之冥海也。無風而洪波百丈。不可得往來。上有九老丈人。九天眞玉宮。蓋太上眞人所居。唯飛仙有能到其處耳。

崑崙號曰崑崙。在海西之戌地。北海之亥地。去岸十三萬里。又有弱水周迴繞。而山東南接積石圃。西北接北戶之室。東北臨大活之井。西南至承淵之谷。此四角大山。寔崑崙之支輔也。積石圃南頭是王母居。周穆王云。咸陽去此四十萬里。山高平地三萬六千里。上有三角。方廣萬里。形如偃盆。下狹上廣。故名曰崑崙山三角。其一角正北。干辰之輝。名曰閭風巔。其一角正西。名曰玄圃堂。其一角正東。名曰崑崙宮。其一角有積金爲天墉城。面方千里。城上安金臺五所。玉樓十二所。其北戶山承淵山。又有墉城金臺玉樓相鮮。如流精之闕。光碧玉之堂。瓊華之室。紫翠丹房。錦雲燭日。朱霞九光。西王母之所治也。眞官仙靈之所宗。上通璿璣。元氣流布。五常玉衡。理九天而調陰陽。品物群生。希奇特出。皆在於此。天人濟濟。不可具記。此乃天地之根紐。萬度之綱柄矣。是以太上名山鼎於五方。鎮地理也。號天柱於珉城。象綱輔也。諸百川極深。水靈居之。其陰

難到故治無常處。非如丘陵而可得論。爾乃天地設位。物象之宜。上聖觀方。緣形而著。爾乃處玄風於西極。坐王母於坤鄉。昆吾鎮於流澤。扶桑植於碧津。離合火生而光獸生於炎野。坎揔衆陰。是以仙都宅於海島。長位名山。蓬山鎮於寅丑。異體元女。養巨木於長洲。高風鼓於群龍之位。暢靈符於瑕丘。至妙玄深。幽神難盡。真人隱宅。靈陵所在。六合之內。豈唯數處而已哉。此蓋舉其標末。爾臣朔所見不博。未能宣通王母及上元夫人聖旨。昔曾聞之於得道者。說此十洲大丘靈阜。皆是真仙隕墟。神官所治。其餘山川萬端。並無覲者矣。其北海外又有鐘山。在北海之子地。隔弱水之北。一萬九千里。高一萬三千里。上方七千里。周旋三萬里。自生玉芝及神草四十餘種。上有金臺玉闕。亦元氣之所舍。天帝居治處也。鐘山之南有平邪山。北有蛟龍山。西有勁草山。東有束木山。四山並鐘山之枝幹也。四山高鐘山三萬里。宮城五所。如一登四面山。下望乃見鐘山爾。四面山乃天帝君之城域也。仙真之人。出入道經。自一路從平邪山東南入穴中。乃到鐘山。北阿門外也。天帝君總九天之維。貴無比焉。山源周廻。具有

四城之高。但當心有觀於崑崙也。昔禹治洪水既畢。乃乘驕車度弱水而到此山。祠上帝於北阿。歸大功於九天。又禹經諸五岳。使工刻石。識其里數高下。其字科斗書。非漢人所書。今丈尺里數。皆禹時書也。不但刻剗五岳。諸名山亦然。刻山之獨高處爾。今書是臣朔所具見。其王母所道諸靈藪。禹所不履。唯書中夏之名山爾。臣先師谷希子者。太上真官也。昔授臣崑崙鐘山蓬萊山及神洲真形圖。昔來入漢。留以寄知故人。此書又尤重於嶽形圖矣。昔也傳授年限。正同爾。陛下好道思微。甄心內向。天尊下降。並傳授寶秘。臣朔區區。亦何嫌惜。而不止所有哉。然術家幽其事。道法秘其師。術泄則事多疑。師顯則妙理散。願且勿宣臣之意也。

武帝欣聞至說。明年遂復從受諸真形圖。常帶之肘後。入節。當朝拜靈書。以書求度脫焉。朔謂滑稽。逆知預觀帝心。故弄萬乘。傲公侯。不可得而師友。不可得而喜怒。故武帝不能盡至理於此人。

列仙傳

漢 劉向

初武帝好方士。淮南王招致賓客。有枕中鴻寶秘密之書。言神仙使鬼物。及流衍重道延命之術。世人莫見。先是安先謀反服誅。何武爲武帝治淮南王獄。獨得其書。向幼而從之。因得受讀。及宣帝卽位。修武帝故事。何異王章王喬等並以通敏有才。進侍左右。及見淮南鑄金之術。上言黃金可成。上使何異上方鑄金。費多不驗。下吏當使兄隱安成侯乞入國中羊贖向罪。上亦以其才得減死。論復徵爲皇門侍郎。講五經於石渠。至成帝時。向旣司典籍。頗修神仙之事。乃知鑄金之術。實有不虛。仙顏久視。眞乎不謬。但世人求之不勤者。遂輯上古以來及秦漢代。博采諸家。言神仙事。約載其人及斯溥焉。

赤松子者。神農時人也。

竇封子者。黃帝時人也。傳爲黃帝陶正。

馬師。黃帝時馬醫也。

赤將子者。黃帝時人。

黃帝者。號曰軒轅。

方回者。堯時隱人也。

偃佺者。槐山採藥人也。堯時人。

容成公者。自稱黃帝師。亦云老子師。

老子姓李。名耳。字伯陽。陳人。生於殷。爲周柱下史。

關令尹喜者。周大夫也。

呂尚者。冀州人也。避紂亂。隱於遼。西周釣於磻溪。

嘯父者。冀州人也。少在西州市上補履。

師門者。嘯父弟子也。爲夏孔甲龍師。

務光者。夏時人也。

仇生者。不知何所人。當殷湯時。爲木正。

彭祖者。殷大夫也。姓錢。名鏗。帝顓頊之孫。



陸終氏中子印疏者。周封史也。

介子推者。姓王。名光。晉人也。

馬丹者。晉人也。文侯時大夫。

穀成子鄉。平常生者。不知何所人也。

陸過者。云楚狂接輿也。

葛由者。周王時人也。

江妃二女者。不知何所人也。逢鄭交甫者。

范蠡。字少伯。徐人也。事師太公望。爲越大夫。

琴高者。趙人也。以琴爲姓。宋康余人。

寇光者。宋景公時人也。

王子喬者。周靈王太子晉也。

幼伯子者。周蘇氏客也。

安期生者。瑯琊鄉人也。

酒客者。梁上酒家人也。

狂光者。上蔡人也。趙簡嘗聘之。

蕭史者。秦穆公時人也。

祝鷄翁者。洛人也。

朱仲者。會稽人也。高后時來獻珠。

修羊公者。魏人也。後以道干景帝。

稷丘居者。秦山下道士也。武帝時爲立祠。

崔文子。太山人也。

赤須子者。豐人也。秦穆公主魚吏。

東方朔。平原厭次人也。

鈞弋夫人者。齊人也。姓趙。武帝幸之。生昭帝。

犢子。鄴人也。

騎龍鳴者。渾亭人也。

王柱者不知何所人也。

園客者濟陰人也。或云陳晉濟陽氏。

鹿皮公者淄州人也。

山圖者隴西人也。

谿父者南郡庸人也。

谷春者櫟陽人也。成帝時爲郎。

昌客者常山道人也。

陰生者長安中渭橋下乞兒也。

子英者舒鄉人也。

毛女者字玉姜。在陰山中。自言始皇宮人也。

服閭者不知何所人也。往來海邊。

文丘者太丘鄉人也。

商丘子晉者高邑人也。

子尙者。楚語而細音。不知何所人。

陶安公者。大安鑄冶師也。

赤斧者。巴戎人也。

呼子先者。漢中關下卜師也。

負局先生者。不知何所人也。語似燕代間人。

牛黃者。廣陵人也。

仙女者。陳市上沽酒婦人也。

黃院內者。睢山道士也。

陵陽子明者。鉅鄉人也。

木羽者。鉅鹿南和平鄉人也。

玄俗者。自言河間人也。

搜神記

晉 干寶

園客者濟陰人也。貌美。邑人多欲妻之。客終不娶。嘗種五色香草。積數十年。服食其實。忽有五色神蛾止香草之上。客收而薦之。以布生華蠶焉。至蠶時。有神女夜至。助客養蠶。亦以香草食蠶。得繭百二十頭。大如瓠。每一繭。繅六七日。乃盡。繅訖。女與客俱仙去。莫知所如。

袁劄者。羌豪也。秦時拘執爲奴隸。後得亡去。秦人追之急。迫藏於穴中。秦人焚之。有景相如虎來爲蔽。故得不死。諸羌神之。推以爲君。

謝紉嘗食客。以朱書符投井中。有一雙鯉魚跳出。卽命作膾。一坐皆徧。

夏侯愷因病死。宗人兒苟奴素見鬼。兒愷數歸。欲取馬。并病其妻。著平上幘。單衣入坐。生時西壁大床。就人覓茶飲。

陳節訪諸神。東海君以織青襦一領遺之。

豫章有一家婢在竈下。忽有人長數寸來竈間壁。婢誤以履踐之。殺一人。須臾

遂有數百人著衰麻服。持棺迎喪。凶儀皆備。就視之。皆是鼠婦。昔魏武軍中無故作白。恰此縞凶喪之徵也。初橫縫其前。以別後。名之曰顏恰。傳行之。至永嘉之間。稍去其縫。名無顏恰。而婦人束髮。其緩彌甚。紒之堅不能自立。髮被於額。日出而已。無頽者愧之言也。覆額者慙之貌也。其緩彌甚者。言天下亡禮與義。放縱情性。及其終極。至於大耻也。

吳中有一書生。皓首。稱胡博士。教授諸生。忽復不見。九月初九日。士人相與登山遊觀。聞講書聲。命僕尋之。見空冢中。羣狐羅列。見人即走。老狐獨不去。乃是皓首書生。

漢時京師賓婚嘉會。皆作魁檯。酒酣之後。續以挽歌。魁檯喪家之樂。挽歌執紼。相偶和之者。天戒若曰。國家當急。殄悴諸貴樂。皆死亡也。南康郡南東望山。有三人入山。見山頂有果樹。衆果畢植。行列整齊。如人行。甘子正熟。三人共食。致飽。乃懷二枚。欲出示人。聞空中語云。催放雙甘。乃聽汝去也。

獻帝初平中。長沙有人姓桓氏。死棺歛月。餘其母聞棺中有聲發之。遂生。占曰。至陰爲陽。下人爲人。其後曹公由庶士起。

羊祜年五歲時。令乳母取所弄金釵。乳母曰。汝先無此物。祜卽詣鄰人李氏東垣桑樹中探得之。主人驚曰。此吾亡兒所失物也。云何持去。乳母具言之。李氏悲惋。時人異之。


初鉤弋夫人有罪。以譴死。既殯。屍不臭。而香聞十餘里。因葬雲陵。上哀悼之。又疑之。又疑其非常人。乃發冢開視。棺空無屍。惟雙履存。

夫金之性一也。以五月丙午日中鑄爲陽燧。以十一月壬子夜半鑄爲陰燧。晉獻公二年。周惠王居於鄭。鄭人入王府。多脫化爲蜮。射人。

湘穴中有黑上。歲大旱。人則共壅水以塞此穴。穴潦則大雨立至。

護軍張劭母病篤。智筮之。使西出市沐猴繫母臂。令傍人槌拍。恒使作聲。三日放去。劭從之。其猴出門。卽爲犬所咋死。母病遂瘳。

南海之外。有鮫人。水居如魚。不廢織績。其眼泣則能出珠。





搜神後記

晉 陶潛

丁令威。本遼東人。學道于靈虛山。後化鶴歸遼。集城門華表柱。時有少年舉弓欲射之。鶴乃飛。徘徊空中而言曰。有鳥有鳥。丁令威。去家千年。今始歸。城郭如故。人民非。何不學仙。冢壘壘。遂高上冲天。今遼東諸丁云。其先世有升仙者。但不知名字耳。

嵩高山北有大穴。莫測其深。百姓歲時游觀。晉初嘗有一人誤墮穴中。同輩翼其儻不死。投食于穴中。墜者得之。爲尋穴而行。計可十餘日。忽然見明。又有草屋。中有二人對坐圍碁。局下有一杯白飲。墜者告以饑渴。碁者曰。可飲此。遂飲之。氣力十倍。碁者曰。汝欲停此否。墜者不願停。碁者曰。從此西行有天井。其中多蛟龍。但投身入井。自當出。若餓取井中物食。墜者如言。半年許乃出。蜀中歸洛下。問張華。華曰。此仙館大。夫所飲者瓊漿也。所食者龍穴石髓也。

會稽剡縣民袁相根碩二人獵。經深山重嶺甚多。見一羣山羊六七頭。逐之。經

一石橋甚狹而峻。羊去根等亦隨渡向絕崖。崖正赤壁立。名曰赤城。上有水流下。廣狹如匹布。剡人謂之瀑布。路徑有山穴如門。豁然而過。既入內。甚平敞。草木皆香。有一小屋。二女子住其中。年皆十五六。容色甚美。着青衣。一名瑩珠。一名□□。見二人至。忻然云。早望汝來。遂爲室家。忽二女出行云。復有得壻者。往慶之。曳履于絕巖上。行琅琅然。二人思歸。潛去歸路。二女追還。已知。乃謂曰。自可去。乃以一腕囊與根等語曰。慎勿開也。於是乃歸。後出行。家人開視其囊。囊如蓮花。一重去。一重纒。至五蓋中。有小青鳥飛去。根哀知此。悵然而已。後根于田中耕。家依常餉之。見在田中不動。就視但有殼。乃蟬蛻也。

滎陽人姓何。忘其名。有名聞士也。荊州辟爲別駕。不就。隱遯養志。常至田舍。人收穫在場上。忽有一人長丈餘。蕭疎單衣。角巾來詣之。翩翩舉其兩手。並舞而來。語何云。君曾見韶舞不。此是韶舞。且舞且去。何尋逐。徑向一山。山有穴。纔容一人。其人命入穴。何亦隨之入。初甚急。前輒開曠。使失人。見有良田數十頃。何遂墾作以爲世業。子孫至今賴之。

晉太元中。武陵人捕魚爲業。緣溪行。忘路遠近。忽逢桃花夾岸。數百步中無雜樹。芳華鮮美。落英繽紛。漁人甚異之。漁人姓黃名道真復前行。欲窮其林。林盡水源。便得一山。山有小口。彷彿若有光。便捨舟從口入。初極狹。纔通人。復行數十步。豁然開朗。土地曠空。屋舍儼然。有良田。美池。桑竹之屬。阡陌交通。雞犬相聞。男女衣著。悉如外人。黃髮垂髫。並怡然自樂。見漁人大驚。問所從來。具答之。便要還家。爲設酒殺雞作食。村中人聞有此人。咸來問訊。自云先世避秦難。率妻子邑人至此絕境。不復出焉。遂與外隔。問今是何世。乃不知有漢。無論魏晉。此人一具言。所聞皆爲歎惋。餘人各復延至其家。皆出酒食。停數日辭去。此中人語云。不足爲外人道也。既出。得其船。便扶向路。處處誌之。及郡。乃詣太守說如此。太守劉歆。卽遣人隨之往。尋向所誌。不復得焉。

南陽劉麟之字子驥。好遊山水。嘗採藥至衡山。深入忘反。見有一澗水。水南有二石囿。一閉一開。水深廣不得渡。欲還失道。遇伐薪人。問徑。僅得還家。或說囿中皆仙方靈藥。及諸雜物。麟之欲更尋索。不復知處。

長沙醴陵縣有小水。有二人乘船取樵。見岸下土穴。中水逐流出。有新斫木片。逐流下。深山中。有人跡。異之。乃相謂曰。可試如水中看。何由爾。一人便以笠自障入穴。穴纔容人行。數十步。便開明。朗然不異世間。

平樂縣有山。臨水。巖間有兩目。如人眼。極大。瞳子白黑分明。名爲目巖。

始興機山東有兩巖。相向如鴟尾。石室數十。所經過。皆聞有金石絲竹之響。中宿縣有貞女峽。峽西岸水際有石。如人形狀。似女子。是曰貞女。父老相傳。秦世有女數人。取螺于此。遇風雨晝昏。而一女化爲此石。

臨城縣南四十里。有蓋山。百許步。有姑舒泉。昔有舒女。與父析薪于此。泉女因坐牽挽不動。乃還告家。比還。唯見清泉湛然。女母曰。吾女好音樂。乃作弦歌。泉涌洞流。有朱鯉一雙。今人作樂嬉戲。泉故涌出。

吳舍人名猛。字世雲。有道術。同縣鄒惠政迎猛。夜于家中庭燒香。忽有虎來抱政兒。超籬去。猛語云。無所苦。須臾當還。虎去數十步。忽然復送兒歸。政遂精進。乞爲好道士。猛性至孝。小兒時在父母旁臥。時夏日多蚊蟲。而終不搖扇。同宿。

人覺問其故。答云懼蚊虫去。嗜我父母爾。及父母終行服幕次。蜀賊縱暴。焚燒  
邑屋。發掘墳壠。民人迸竄。猛在墓側。號慟不去。賊爲之感愴。遂不犯。

謝允從武當山還。在桓宣武座。有言及左元放爲曹公致鱸魚者。允便云。此可  
得爾。求大瓮盛水。朱書符投水中。俄有一鯉魚鼓鬣水中。

錢塘杜子恭。有秘術。嘗就人借瓜刀。其主求之。子恭曰。當卽相還耳。既而刀主  
行至嘉興。有魚躍入船中。破魚腹得瓜刀。

太興中。衡陽區純作鼠市。四方丈餘。開四門。門有一木人。縱四五鼠于中。欲出  
門。木人輒以手推之。

晉大司馬桓溫。字元子。末年忽有一比丘尼。失其名。來自遠方。投溫爲檀越。尼  
才行不恒。溫甚敬待。居之門內。尼每浴。必至移時。溫疑而窺之。見尼裸身。揮刀  
破腹出臟。斷截身首。支分糲切。溫怪駭而還。及至尼出浴室。身形如常。溫以實  
問。尼答曰。若逐凌君上。邢當如之。時溫方謀問鼎。聞之。悵然。故以戒懼。終守臣  
節。尼後辭去。不知所在。

沛國有一士人姓周。同生三子。年將弱冠。皆有聲無言。忽有一客從門過。因乞飲。聞其兒聲。問之曰。此是何聲。答曰。是僕之子。皆不能言。客曰。君可還內省過。何以致此。主人異其言。知非常人。良久出云。都不憶有罪過。客曰。試更思幼時事。入內食頃。出語客曰。記小兒時。當牀上有燕巢。中有三子。其母從外得食哺三子。皆出口受之。積日如此。試以指內巢。中燕雛亦出口承受。因取三薺茨各與食之。俄而皆死。母還不見子。悲鳴而去。昔有此事。今實悔之。客聞言。遂變爲道人之容。曰。君既自知悔。罪今除矣。言訖。便聞其子言語。忽不見此道人。天竺人佛圖澄。永嘉四年。來洛陽。善誦神咒。役使鬼神。腹旁有一孔。常以絮塞之。每夜讀書。則拔絮孔中。出光照于一室。平旦至流水側。從孔中引出五臟六腑。洗之。訖還內腹中。

石虎鄴中有一胡道人。知呪術。乘驢作估客于外國。深山中行。下有絕澗。窅然無底。忽有惡鬼偷牽此道人驢。下入絕澗。道人尋跡呪誓。呼諸鬼王。與即驢物如故。

曇遊道人清苦沙門也。剡縣有一家事蠱人。噉其食飲。無不吐血死。遊嘗詣之。主人下食。遊依常祝願。一雙蜈蚣長尺餘。便于盤中跳走。遊便飽食而歸。安然無他。

高悝家有鬼怪。言語呵叱。投擲內外。不見人形。或器物自行。再三發火。巫祝厭効而不能絕。適值幸靈。乃要之至門。見符索甚多。並取焚之。惟據軒小坐而去。其夕鬼怪即絕。

趙固常乘一匹赤馬以戰征。甚所愛重。常繫所住齋前。忽腹脹。少時死。郭璞從北過。因往詣之。門吏云。將軍好馬甚愛惜。今死盛懊惋。璞便語門吏云。可入通。道吾能活此馬。則必見我。門吏聞之驚喜。即啓固。固因踴躍。令門吏走往迎之。始交寒溫。便問卿能活我馬乎。璞曰。我可活爾。固忻喜。即問須何方術。璞云。得卿同心健兒二三十人。皆令持竹竿于此。東行三十里。當有丘陵林樹。狀若社廟。有此者。便當以竹竿攪擾。打拍之。當得一物。便急持歸。既得此物。馬便活矣。于是左右驍勇之士五十人。使去。果如璞言。得大叢林。有一物似猴而非。走出人。

共逐得便抱持歸。此物遙見死馬。便跳梁欲往。璞令放之。此物便自走往馬頭間。噓吸其鼻良久。馬起噴奮奔迅。便不見此物。固厚賞給。璞得過江左。

王文獻曾令郭璞筮已一年吉凶。璞曰。當有小不吉利。可取廣州二大甕盛水。置床張二角。各覆鏡好以厭之。至某時撒甕去水。如此其災可消。至日忘之。尋失銅鏡。不知所在。後撒去水。乃見所失鏡在于甕中。甕口數寸。鏡大尺餘。王公復令璞筮鏡甕之意。璞云。撒蓋違期。故至此妖。邪魅所爲。無他故也。使燒車轄而鏡立出。

中興初郭璞每自爲卦。知其凶終。嘗行經建康柵塘。逢一趨步少年甚寒。便牽住脫絲布袍與之。其人辭不受。璞曰。但取後自當知。其人受而去。及當死。果此人行刑。旁人皆爲求屬。璞曰。我託之久矣。此人爲之歔歔哽咽。行刑既畢。此人乃說。

高平郗超。字嘉賓。年二十餘。得重病。盧江杜不愆少就外祖郭璞學易卜。頗有經驗。超令試占之。卦成。不愆曰。案卦言之。卿所恙尋愈。然宜于東北三十里上。



官姓家。索其所養雄雉。籠而絆之。置東簷下。却後九日。景午日午時。必當有野雉飛來。與交合。既畢。雙飛去。若如此。不出二十日。病都除。又是休應。年將八十。位極人臣。若但雌逝。雄留者。病一周方差。年半八十。名位亦失。超時正羸。篤慮命在旦夕。笑而答曰。若保八十之半。便有餘矣。一周病差。何足爲淹。然未之信。或勸依其言。索雄果得。至景午日。超臥南軒之下。觀之。至日晏。果有雌雉飛入籠。與雄雉交而去。雄雉不動。超歎息曰。管郭之奇。何以尙此。超病逾年。乃起。至四十卒于中書郎。



冥祥記

晉 王琰

劉度

劉度平原聊城人也。鄉里千餘家。並奉大法。造立形像。供養僧尼。值虜主木末時。此縣常有逋逃。末大怒欲盡滅一城。衆皆兇懼。分必殄盡。度乃潔誠率衆歸命觀世音。頃之。末見物從空下。繞其屋柱。驚視乃觀世音經。末大歡喜。因省刑戮。於是此城卽得免害。

釋法智

沙門釋法智爲白衣時。嘗獨行至大澤中。忽遇猛火。四方俱起。走路已絕。使至心禮誦觀世音。俄而火過。一澤之草。無有遺莖者。惟法智所容身處不燒。始乃敬奉大法。後爲姚興將。從征索虜。軍退失馬。落在圍裏。乃隱溝邊叢棗中。得蔽頭。復念觀世音。心甚勤至。隔溝人遙喚後軍。指令殺之。而軍過搜覓。輒無見者。遂得免。後逕出家。

智通

尼宋智通。年少從師。不專。師死。罷道。嫁魏郡梁甫。生一男。家貧。無以爲衣。有法華等經。悉練之以衣其身。俄得病。徧體壞爛。狀若火瘡。有細白蟲。日出數升餘。晝夜號叫。聞空中語云。壞經爲衣。得此報。旬餘而死。

明相寺

鳳州城南有明相寺。佛數尊。皆飾以金焉。亂罹之後。有貧民。刮金鬻而自給。迨至時寧。金彩已盡。於是遍身生癬。癢不可忍。必須以物自刮。皮盡至肉。肉盡至骨而死焉。

薛孤訓


唐貞觀二十年。征龜茲。有薛孤訓者。爲行軍倉曹軍。及屠龜茲後。乃於精舍剝佛面金。旬日之間。眉毛盡落。還至伊州。乃於佛前悔過。以所得金。皆爲造功德。未幾。眉毛復生。

沙門法稱

宋沙門洙稱臨終曰有松山人告我江東劉將軍應受天命。吾以三十二壁一餅金爲信。宋祖聞之。命僧惠義往松山。七日七夜行道。夢有一長鬚翁指示。及覺。分明憶所在。掘而得之。

費崇先

費崇先少信佛法。常以鵲尾香爐置膝前。



述異記

梁 任昉

盤古人

昔盤古氏之死也。頭為四岳。目為日月。脂膏為江海。毛髮為草木。秦漢間俗說盤古氏頭為東岳。腹為中岳。左臂為南岳。右臂為北岳。足為西岳。先儒說盤古氏泣為江河。氣為風。聲為雷。目瞳為電。古說盤古氏喜為晴。怒為陰。吳楚間說盤古氏。夫妻陰陽之始也。今南海有盤古氏墓。亘三百餘里。俗云後人追葬盤古之魂也。桂林有盤古氏廟。今人祀。

鬼母

南海小虞山中。有鬼母。能產天地鬼。一產十鬼。朝產之。暮食之。今蒼梧有鬼姑神是也。虎頭龍足。蟒目蛟眉。蟒蛇目圓。蛟眉連生。今吳越間防風廟。土木作其形。龍首牛耳。連眉一目。

防風氏

昔禹會塗山。執玉帛者萬國。防風氏後至。禹誅之。其長三丈。其骨頤專車。今南中民有姓防風氏。即其後。

響玉

侯家廂客則鳴響玉。

蛇市

揚州有蛇市。市人鬻珠玉而雜貨蛟布。蛟人即泉先也。又名泉客。

龍紗

南海出蛟綃紗。泉先潛織。一名龍紗。其價百餘金。以爲服。入水不濡。

龍綃宮

南海有龍綃宮。泉先織綃之處。綃有白之如霜者。

珊瑚市

鬱林郡有珊瑚市。海先市。珊瑚樹碧色。生海底。一株十枝。枝間無葉。大者高五六尺。至小者尺餘。蛟人云海上有珊瑚宮。漢元封二年。鬱林郡獻珊瑚。



女珊瑚

光武時南海獻珊瑚婦人帝命植於殿前謂之女珊瑚一旦柯葉甚茂至靈帝時樹死咸以謂漢室將亡之徵也。

龍珠

凡珠有龍珠。龍所吐者。蛇珠。蛇所吐者。南海俗諺云。蛇珠千枚。不及玫瑰。言蛇珠賤也。玫瑰亦是美珠也。越人諺云。種千畝木奴。不如一龍珠。

珠市

越俗以珠為上寶。生女謂之珠娘。生男謂之珠兒。吳越間俗說明珠一斛。貴如玉者。合浦有珠市。

瑞筍

東海畔有孤竹焉。斬而復生。中有管。周武王時孤竹之國獻瑞筍一株。

空桑

空桑生大野山中。為琴瑟之最者。空桑也。

古宮

帝舜都郭門古宮存焉。宮前有堯臺舜館。銘記古文莫有識者。

湘竹

湘水去岸三十里許。有相思宮。望帝臺。昔舜南巡而葬於蒼梧之野。堯之二女娥皇女英。追之不及。相與慟哭。淚下沾竹。竹文上爲之斑斑然。

懶婦魚

江南有懶婦魚。俗云昔楊氏家婦。爲姑所溺而死。化爲魚焉。其脂膏可燃燈燭。以之照鳴琴博奕。則爛然有光。及照紡績。則不復明焉。

琵琶魚

海魚千歲爲劍魚。一名琵琶。形如琵琶而善鳴。因以名焉。

角虎

漢中山有虎生角。道家云虎千年則牙蛻而角生。

闔閭墓

闔閭夫人墓中。周迴八里。別館洞房。迤邐相屬。漆燈照爛如日月焉。尤異者。金蠶玉燕。各千餘雙。

### 姑蘇臺

吳王夫差。築姑蘇之臺。三年乃成。周旋詰屈。橫亘五里。崇飾土木。殫耗人力。宮妓數千人。上別立春宵宮。爲長夜之飲。造千石酒鍾。夫差作天池。池中造青龍舟。舟中盛陳妓樂。日與西施爲水嬉。吳王於宮中作海靈館。館娃閣。銅溝。玉檻。宮之楹。檻。珠玉飾之。

### 文種墓

廣州東界有大夫文種之墓。墓下有石爲華表柱。石鶴一隻。種卽越王勾踐之謀臣也。

### 趙王園

邯鄲有故宮基存焉。中有趙王之果園。梅李至冬而花。春得而食。

### 銅駝石犬

鄴中銅駝鄉。魏武帝陵下銅駝石犬各二。古詩云。石犬不可吠。銅駝徒爾爲。

### 香水

一說香水在并州。其水香潔。浴之去病。吳故宫亦有香水溪。俗云西施浴處。人呼爲脂粉塘。吳王宮人濯粧於此溪上。源至今馨香。古詩云。安得香水泉。濯郎衣上塵。俗說魏武帝陵中亦有泉。謂之香水。

### 磨鏡石

饒州俗傳軒轅氏鑄鏡於湖邊。今有軒轅磨鏡石。石上常潔。不生蔓草。

### 裸人鄉

桂林東南邊海有裸川。桓譚新論云。呈衣冠於裸川。海上有裸人鄉。

### 石麒麟

丹陽大姑陵。陵下有石麟二枚。不知年代。傳曰秦漢間公卿墓。則以石麒麟鎮之。虞氏縣有盧君古塚。塚旁栢二株。枝條蔭茂。二百餘步。樹文隱起。皆如龜甲。根勁如銅石。

彈箏谷

安定西隴道。其谷中有彈箏之聲。行人過聞之。謂之彈箏谷。

粉水

粉水出房陵永清谷。取其水以漬粉。卽鮮潔有異於常。謂之粉水。

九井

漢水西山有九井。井中常出五色煙。高數丈。傳云昔人有緇入得數斛空青。

却塵犀

却塵犀。海獸也。然其角辟塵。致之於座。塵埃不入。

燃石

羊山上有燃石。其色黃而文理疎。以水沃之。便如煎沸。其上可炊烹。稍冷卽復以水沃之。

辟寒香

辟寒香。丹丹國所出。漢武時入貢。每至大寒。於室焚之。暖氣翕然。自外而入。

皆減衣。

迷穀

迷穀出招搖山。亦名鵠山。其樹如穀。又如楮。其花四照。名曰迷穀。如佩之令人不迷。

夢口穴

南康樛都縣西。沿江有石室。名夢口穴。嘗有船人遇一人通身黃衣。擔兩籠黃瓜。求寄載。過至岸下。此人唾盤上。徑下。直入石穴中。船主初甚忿之。見其人入石。始知異。視盤上唾。悉是金矣。

明月珠

噲叅養母至孝。曾有玄鶴。爲戎人所射。窮而歸叅。叅收養療治。瘡愈放之。後鶴到門外。叅秉燭視鶴。鷓雄雙至。各銜明月珠。以置叅家。

風生獸

炎洲在南海中。上有風生獸。似豹。青色。大如狸。網取之。積薪數車。燒之不燃。鐵

鎚鍛頭數十下乃死。以口向風。須臾便活。以石上莖蒲塞鼻。卽眞死。取其腦和菊花服之。可壽五百歲。

### 異鳥

蘭陵山有井。異鳥巢其中。金翅而身黑。此鳥見卽大水。井不可窺。窺者盈歲輒死。

### 玉女岡

斗鄉西津有玉女岡。天當雨。輒先涌五色氣於石間。俗謂玉女披衣。

### 石鼓

八方之荒有石鼓。其徑千里。撞之其音卽成雷也。天之申威於此。

### 黑蠶

員嶠山名還丘。東有雲石。廣五百里。有蠶長七寸。黑色有鱗角。以霜雪覆之。然後作繭。長一尺。其色五采。織爲文錦。入水不濡。

### 妬女泉

并州妬女泉。婦人不得艷粧綵服至其地。必興雲雨。一名是介推妹。

兪兒

齊桓公北征孤竹。見人長尺。具衣冠左袂而走於馬前。管仲曰。此山之神也。名曰兪兒。霸王之君興。則見也。

石室山

信安郡石室山。晉時王質伐木至。見童子數人碁而歌。質因聽之。童子以一物與質。如棗核。質含之不覺饑。俄頃童子謂曰。何不去。質起視斧柯爛盡。既歸無復時人。

螺亭

螺亭在南康郡。昔有正女採螺爲業。曾宿此亭。夜聞空中風雨聲。乃見衆螺張口而至。便亂噉其肉。明日惟有骨存焉。故號此亭爲螺亭。

棗梨

北方有七尺之棗。南方有三尺之梨。凡人不得見。或見而食之。卽爲地仙。



積憂蟲

漢武帝幸甘泉長平阪。道中有虫赤如肝。頭目口齒悉具。人莫知也。時東方朔曰。此古秦獄地也。積憂所致。上使按圖。果秦獄地。朔曰。夫積憂者得酒而解。乃取虫置酒中。立消。

止雨笛

周穆王時。天下連雨三月。穆王乃吹笛。其雨遂止。

報春鳥

顧渚山有報春鳥。春至則鳴。秋分亦鳴。似鷓鴣之類也。

還魂樹

聚窟州有返魂樹。伐其根心於玉釜中。煮取汁。又熬之。令可丸。名曰驚精香。或名震靈丸。或名反生香。或名卻死香。死尸在地。聞氣即活。

獬豸

獬豸者。一角之羊也。性知人有罪。皋陶治獄。其罪疑者。令羊觸之。

黃頭郎

鄧通以權船爲黃頭郎。曰土勝水。其色黃。故刺船郎皆著黃帽。

雜

化蛾

楚莊王時。宮人一旦而化爲野蛾飛去。

古諺

漢世古諺曰。雖有神藥。不如少年。雖有珠玉。不如金錢。

香市

日南有香市。商人交易諸香處。

香尉

漢雍仲子進南海香物。拜爲涪陽尉。時謂之香尉。日南有千畝林。名香出其中。

宮人草

楚中有宮人草。狀如金荳而甚氛氳。花色紅翠。俗說楚靈王時。宮人數千。皆多愁曠。有囚死於宮中者。葬之後墓上悉生此花。

靈楓

南中有楓子鬼。楓木之老者爲人形。亦呼爲靈楓。

甜溪

甜溪水其味如蜜。東方朔得以獻武帝。帝乃投於陰井中。井水遂甜而寒。洗浴則肌理柔滑。

離合風

列禦寇鄭人御風而行。常以立春日歸乎八荒。立秋日遊于風穴。是風至卽草木皆生。去則草木皆落。謂之離合風。

玉燕釵

漢武帝元鼎元年。起招靈閣。有一神女留一玉釵與帝。帝以賜趙婕妤。至昭帝元鳳中。宮人見此釵。光瑩甚異。共謀欲碎之。明視釵匣。唯見白燕直升天去。後宮人常作玉釵。因名玉燕釵。

辟寒金

三國時。昆明國貢魏瀨金鳥。鳥形如雀。色常翱翔海上。吐金屑如粟。至冬此鳥即畏霜雪。魏帝乃起溫室以處之。名曰辟寒臺。故謂吐此金爲辟寒金也。

石櫛石履

興安縣水邊有平石。其上有石櫛石履。各一具。俗云越王渡溪。脫履墮櫛於此。

乳窟

荊州清溪秀壁諸山。山洞往往有乳窟。窟中多玉泉。交流中有白蝙蝠大如鴉。

水虺

水虺五百年化爲蛟。蛟千年化爲龍。龍五百年爲角龍。千年爲應龍。

封使君

漢宣城郡守封邵。巨化爲虎。食郡民。呼之曰封使君。因去不復來。故時語曰。無作封使君。生來治民死食民。夫人無德而壽。則爲虎。虎不食人。人化虎則食人。蓋耻其類而惡之。

獍

獍之爲獸。狀如虎豹而小。始生還食其母。故曰梟獍。

鵠國人

西海外有鵠國人。長七寸。日行千里。百獸不犯。惟畏海鵠。鵠見必吞之。在鵠腹中不死。鵠一舉亦千里。

獬豸

獬豸。獸中最大者。龍頭馬尾。虎爪長四百尺。善走。以人爲食。遇有道君卽隱藏。無道君卽出食人。

鼠國

西域有鼠國。大者如犬。中者如兔。小者如常鼠。頭悉白。商賈有經過其國者。若不祈之。則嚙人衣裳。

六角牛

周成王時。東夷送六角牛。

磅礮山

磅磳山。去扶桑五萬里。日所不及。其地甚寒。有桃樹千圍。萬年一實。一說日本國有金桃。其實重一斤。

活人草

漢武帝時。西方日支國。有獻活人草三莖。有人死者。將草覆面。卽活。

玉桃

崑崙山有玉桃。光明洞澈而堅瑩。須以玉井泉洗之。便軟可食。

虹飲

晉時晉陵薛願家有虹飲。其釜中水。須臾而竭。願因以酒祝而益之。虹復飲。盡吐金滿釜而去。願家遂至大富。

真香茗

巴東有真香茗。其花白色。如薔薇。煎服令人不眠。能誦無忘。

伺潮鷄

伺潮鷄。潮水上則鳴。孫綽望海賦曰。石鷄清響而應潮是也。

龍美

漢元和元年大雨。有一青龍墮於宮中。帝命烹之。賜羣臣龍羹各一杯。故李尤七命曰。味兼龍羹。七命即文章名也。

青牛

千年木精為青牛。

猿

猿五百歲化為獾。獾千歲化為老人。

鵠

鵠壽三千歲。

鷺

鷺至千年生胡髯。

虎魚

虎魚老者為蛟。

穆王犬

周穆王之犬。日走千里。食虎豹。

水精宮

闔閭搆水精宮。尤極珍怪。皆出自水府。

雨魚

古說雍州雨魚。長八尺寸許。

雨金

漢惠帝二年。宮中雨黃金黑錫。

雨錢

周時成陽雨錢。終日而絕。

雨鹿

漢成帝末年。宮中雨一蒼鹿。殺而食之。其味甚美。

雨石



魏武帝末年。鄴中雨五色石。

雨棗

魏世河內冬雨棗。

禹餘糧

今藥中有禹餘糧者。世傳昔禹治水。棄其所餘糧於江中。生爲藥也。

懶婦箴

桂林有睡草。見之則令人睡。一名醉草。亦呼爲懶婦箴。又出海南地記。

鳴琴川

梧桐園在吳宮。本吳王夫差舊園也。一名鳴琴川。

桄榔麵

西蜀石門山有樹名曰桄榔。皮裏出屑如麵。用作餅食之如麵相似。因謂之桄榔麵焉。

蟹奴

瓊蛤似小蚌有一小蟹在腹中為蛤。出求食。故淮海之人呼為蟹奴。

右述異記為梁任昉撰說郛所載僅得十之三四茲據安義王軼羣校本補錄于後

南海中盤古國。今人皆以盤古為姓。昉按盤古氏。天地萬物之祖也。然則生物始於盤古。

越俗祭防風神。奏防風古樂。截竹長三尺。吹之如嗥。三人披髮而舞。

軒轅之初立也。有蚩尤氏兄弟七十二人。銅頭鐵額。食鐵石。軒轅誅之於涿

鹿之野。蚩尤能作雲霧。涿鹿今在冀州。有蚩尤神。俗云人身牛蹄。四目六手。

今冀州人掘地得髑髏如銅鐵者。即蚩尤之骨也。今有蚩尤齒長二寸。堅不

可碎。秦漢間說蚩尤氏耳髮如劍戟。頭有角。與軒轅鬪。以角觝人。人不能向。

今冀州有樂名蚩尤戲。其名兩兩三三。頭戴牛角而相觝。漢造角觝戲。蓋其遺製也。

太原村落間祭蚩尤神。不用牛頭。今冀州有蚩尤川。即涿鹿之野。漢武時太

原有蚩尤神畫見龜足蛇首主疫其俗遂爲立祠。

堯使鯀治洪水不勝其任遂誅鯀於羽山化爲黃熊奴來陸居曰熊水居曰熊反助按今江淮中有鮒

名熊熊虵之精至冬化爲雉至夏復爲虵今吳中不食雉毒故也。

昔炎帝女溺死東海中化爲精衛其名自呼每銜西山木石填東海偶海燕而生子生雌狀如精衛生雄如海燕今東海精衛誓水處曾溺於此川誓不飲其水一名鳥市一名冤禽又名志鳥俗呼帝女雀。

東海島龍川穆天子養八駿處也島中有草名龍芻馬食之一日千里古語云一株龍芻化爲龍駒。

陶唐之世越常國獻千歲神龜方三尺餘背上有文科斗書記開闢以來帝命錄之謂之龜歷伏滔述帝功德銘曰胡書龜歷之文。

夏桀宮中有女子化爲龍不可近俄而復爲婦人甚麗而食人桀命爲蛟妾告桀吉凶。

桀時泰山山走石泣。先儒說桀之將亡，泰山三日泣。今泰山山石望之，若人泣，蓋是也。周武謂周公曰：桀爲不道，走山泣石。

堯爲仁君，一日十瑞。宮中芻化爲禾，鳳凰止於庭，神龍見於宮沼，歷草生堦，宮禽五色，鳥化白，神木生蓮，蓬蒲生廚，景星耀於天，甘露降于地，是爲十瑞。周成王元年，貝多國人獻舞雀，周公命反之。南海中有軒轅工，鸞自歌，鳳自舞，古云天帝樂也。

煙峒山中有堯碑禹碣，皆籀文焉。伏滔述帝功德，銘曰：堯碣禹碑，歷古不昧。會稽山有虞舜巡狩台，台下有望陵祠，帝舜南巡，葬於九疑，民思之立祠，曰望陵祠。

昔戰國時，魏國苦秦之難，有以民從征，戍秦久不返，妻思而卒，既葬，塚上生木，枝葉皆向夫所在而傾，因謂之相思木。今秦趙間有相思草，狀如石竹，而節節相續，一名斷腸草，又名愁婦草，亦名霜草，人呼寮莎，蓋相思之流也。沮渙二水，波文皆著五色，彼人多文章，故一名績水，灌肥之間，離別亭，古送

別處漢沔會流處岸上有石銘云下至水府三十一里皆傳云李斯刻此石鹿千年化爲蒼又五百年化爲白又五百年化爲玄漢成帝時山中人得玄鹿烹而視之骨皆黑色仙者說玄鹿爲脯食之壽二千歲

餘于縣有白鹿土人皆傳千年矣晉成帝遣捕得銅牌在角後書云漢元鼎二年臨所獻白鹿

淮水中黃雀至秋化爲蛤春復化爲黃雀五百年化爲昏蛤梓樹之精化爲青牛生百年而紅五百年而黃又五百年而色蒼又五百年而色白

龜千年生毛龜壽五千年謂之神龜萬年曰靈龜

濟陽山麻姑登仙處俗說山上千年金鷄鳴玉犬吠

吳既滅越樓勾踐于會稽之上地方千里勾踐得范蠡之謀乃示民以耕桑延四方之士作臺於外而館賢士今會稽山有越王臺今交州麻林一名紵林勾踐種麻將以宏弓交州糠頭山勾踐貯米於其上春積糠爲山今會稽之上有越王鑄劍洲往往有得古箭鏃蓋古制也

洞庭湖中有釣洲。范蠡乘扁舟至此。遇風止釣於洲上。刻石記焉。有一陂。陂中有范蠡魚。昔范蠡釣得大魚烹食之。小者放於陂中。陂邊有范蠡石牀石硯。

鈞鏐。范蠡宅在湖中。多桑紵英果。有海杏大如拳。若年楸。此條疑有悞字

盧府君墓。在館陶縣南二十里。不知何代。銘曰。盧府君歸真之室。

盧陵郡有董氏之宅。前有董家祠。昔有董氏。語其鄉人曰。吾當盡室作神。及死。家人老幼皆卒。鄉人往往見之。稱吾於地下作盧陵侯。鄉人因爲立祠。能致風雨。

吐綬鳥。其身大如鶴。五色。出巴東山。毛色可愛。若天晴淑景。卽吐綬長一尺。須臾還吞之。陰滯卽不吐。陽泉在天餘山北。清流數十步。所涵草木皆化爲石。精明堅勁。其水所經之處。物皆積爲石。

南方有火山。四月生火。十二月火滅。火滅之後。草木皆生枝條。至火生。草木葉落。如中國寒時也。取此木以爲薪。燃之不燼。以其皮積之爲火浣布。

玉門西南有一國。國中有山石磻。

子朴切。

千枚。名爲霹靂磻。從春雷而磻滅。至

秋磻盡。雷收復生。年年如此。宣城蓋山有舒姑泉。俗傳有舒氏女。與父析薪。女坐泉處。忽牽挽不動。父遽告家。及再至其地。惟見清泉湛然。其母曰。女好

音樂。乃作宏歌。泉乃涌流。

搗衣山。一名靈山。在瑯琊郡。山南絕險。巖有方石。昔有神女於此搗衣。其石

明瑩。謂之玉女擣練碓。

嶠州去玉門三千里。地寒多雪。著木石之上。皆融而甘。可以爲菓。

嶠且嚴反。

秦始皇作石橋於海上。欲過海視日出處。有神人驅石去不速。神人鞭之。皆流血。今石橋其色猶赤。

園客者。濟陰人。貌美。色人多欲妻之。客終不娶。常種五色香。積十餘年。服食其實。忽有色蛾。集香草上。客薦之以布。生華蠶焉。時有一女自來。自言爲助養蠶。以香草食之。得繭一百二十枚。繭大如瓊。每一繭繅六七日。絲方盡。繅訖。此女與客俱仙去。

和州歷陽淪爲湖。昔有書生遇一老姥待厚之。生謂姥曰：此縣門石龜眼血出此地，當陷爲湖。姥後數往視之。門吏問姥，姥具答之。吏以硃點龜眼。姥見之，遂走上北山。顧城遂陷焉。今湖中有明府魚、奴魚、婢魚。

荀環，字叔偉，潛棲養性。嘗東遊憩江夏黃鶴樓上。望西南有物飄然降自霄漢，俄頃已至。乃駕鶴之仙也。鶴止戶側，仙者就席，羽衣紅裳，賓主歡對，已而辭去，跨鶴騰空而滅。

晉安郡有一書生謝端，爲性介潔，不染聲色。嘗於海岸觀濤，得一大螺，大如一石米斛，割之，中有美女。曰：予天漢中白水素女，天帝矜卿純正，令爲君作婦。端以爲妖呵責，遣之女嘆息升雲而去。

東陽郡永康縣吳時，有人入山逢大龜，擔之未至家，遇夜纜舟於岸，見老桑呼龜曰：元緒汝當死矣。龜呼桑樹曰：子明無苦也。雖然，盡南山之樵，不能潰我。對曰：諸葛恪明敏，禍必及於予。明日其人將龜獻吳王，命煮之。三日三夜不死，遂問諸葛恪。恪曰：此龜有精，須得多載老桑爲薪煮之，立爛。遂命老桑



斫之爲薪。既燃卽爛。

洞庭山有宮五門。東通林屋。西達蛾眉。南接羅浮。北連岱岳。東有石樓。樓下兩石扣之。清越。所謂神鉏。昔有青童秉燭。颺飛輪之車。至此其跡存焉。上有天帝壇。山有金牛穴。吳孫權時。令人掘金。金化爲牛。走上山。其跡存焉。故號爲金牛穴。

范文。本日南奴也。爲奴時。牧羊於澗中。得兩鯉魚。欲私食之。郎知詰文。詐云將礪石。還非魚也。郎至魚所。果見兩石。文異之。石有鐵文。因入山中。就冶作兩刀。因舉刀向鄣。鄣卽蕃中山地名也。咒曰。鯉魚變化。治成刀。斫石鄣破者。是有神靈。文當治此國。遂斫破之。衆遂推爲君。

宋武帝微時。伐荻於新洲。見一大蛇。長數丈。遂射之。傷。明日復往觀之。聞杵臼聲。覘見數青衣童子。搗藥。問其故。答曰。我王爲劉寄奴所射。今合藥。傳之。帝曰。何神也。童子不答。帝叱之。皆散。收得藥。人因名此草爲劉寄奴。吳王闔閭。葬於吳縣。三月。有白虎居其上。號曰虎丘。

晉太康中會稽縣蠶螟及羊皆化爲鼠。蠶始變者有毛而無肉。大食新稻。封微山中有怒毛獸。若不嘔毛短三寸。若嘔毛長三尺。

南金山有師子獸。其毛黃赤而光鮮。耳小口鳴。時地動石裂也。

北方荒外有石湖方十里。中有橫公魚。夜卽化爲人。刺之不入。煮之不死。若以烏梅二十箇煮之。卽熟。可治邪病。

東海郡尉于台有杏一株。花雜五色。六出。號六仙人杏。

龍肝瓜長一尺。花紅葉素。生於冰谷。所謂冰谷素葉之瓜。

越俗說會稽山夏禹廟中有梅梁。忽一春而生枝葉。

漢成帝時與趙飛燕游太液池。以沙棠木爲舟。其木出崑崙山。人食其實。入水不溺。詩曰。安得沙棠木。剗以爲舟船。

岑華山在西海之西。有蔓竹爲簫管。吹之若羣鳳之鳴。

魏興錫義山多生微蘅草。有風不偃。無風獨搖。

黃金山有楠樹。一年東邊榮。西邊枯。後年西邊榮。東邊枯。年年如此。張華云。

交讓樹也。

石勒嘗備於臨水爲遊軍所囚。會有羣鹿傍道。軍人競逐之。勒乃獲免。俄而又見一老父謂勒曰。何來羣鹿者。我也。君應爲列國主。故相救耳。

大食王國在西海中。有一方石。石上多樹。幹赤葉青。枝上總生小兒。長六七寸。見人皆笑。動其手足。頭著樹枝。使摘一枝。小兒便死。

取鳥之未生毛者。以丹和牛肉使吞。至長羽毛皆赤。殺之。陰乾。杵服。壽五百歲。案消山有石樓樹。吳太皇元年。郡吏伍曜於海際得之。枝莖紫色。有光。南越謂之石連理也。

南海有明珠。卽鯨魚目。瞳鯨死而目皆無精。可以鑿。謂之夜光。

□□□化爲蝗。而食五穀。百歲爲鼠。

□□□羊而無角。啖之毒。

古□□十一名胡髯郎。又名青鳥。

闍闔搆水精宮。尤極珍怪。皆出自水府。

瀨鄉老子祠有紫石榴紅縹李一李二色。

勾漏縣有白橘青柑縹杏。

南中生子母竹今之慈竹也。

漢章帝元年上虞縣獻二蒂瓜一實二蒂及玉色橘趙王故城俗呼爲麋鹿城梁孝王築平臺臺猶存有蒹葭洲鳧藻洲梳洗潭中有望秦山商人望鄉之處具宮夫人廟在太一山下云懷元年夫人也廟即其基也。

當陽南有龍川鳳川云漢武帝時八龍五鳳常見於此亦呼爲五鳳州魏文帝甄后陵在鄴中臨漳東北至今有甄后神。

殷紂時大龜生毛而兔生角是甲兵將興之兆。

周幽王時牛化爲虎羊化爲狼洛南有避狼城云幽王時羣羊爲狼食人故築城避之今洛中有狼村是其處也。

關中有金魚神云周平二年十旬不雨遣祭天神俄而生涌泉金魚躍出而雨降。

秦始皇帝至東海。海神捧珠獻於帝前。今海畔有秦皇受珠臺。

東海上有蒲臺。秦始皇至此臺下。繫蒲擊馬。蒲至今縈紆。

始皇二十六年童謠云。阿房阿房亡始皇。

先儒說禹夏時。天雨金三日。古詩云。安得天雨金。使金賤如土是也。

周成王時。咸陽雨金。今咸陽有雨金原。

王莽時。未央宮中。雨五銖錢。既而至地。悉爲龜兒。

漢時翁仲。儒家人居貧力作。居渭川。一旦天雨金十斛於其家。

漢惠帝二年。宮中雨黃金黑錫。

呂后三年。天雨粟。

漢宣帝時。江淮饑饉。人相食。雨穀。三秦魏地。亡穀二千頃。

漢武帝時。廣陽縣雨麥。

河間有雨錢城。漢世天雨鉛錫於此。

秦二世元年。宮中雨金。既而頃刻皆化爲石。

漢成帝末年。宮中雨一蒼鹿。殺而食之。其味甚美。  
大禹時。天雨稻。古詩云。天雨稻。飼我天下民。

漢世潁川民家雨金銖錢。

吳桓王時。金陵雨五穀於貧民家。富者則不雨矣。

魏時河間王子元家。雨中有小兒。八九枚。墮於庭前。長六七寸許。自言家在河東南。爲風所飄。而至於君庭。與之言。甚有所知。如史傳所述者。舊說周秦間。河南酸棗。遂生野棗。今酸棗縣是也。

魏文帝安陽殿前。天降朱李八枚。啖一枚。數日不食。今李種有安陽李。大而味甘者。卽其種也。

漢末楊氏家園中。產神榛三株。

武陵源在吳中山。無他木。盡生桃李。俗呼爲桃李源。源上有石洞。洞中有乳水。世傳秦末喪亂。吳中人於此避難。食桃李實者。皆得仙。

杜陵有金李。李大者謂之夏李。尤小者呼爲鼠李。桃之大者爲木桃。詩云。投

我以木桃是也。

房陵定山有朱仲李園三十六所。潘岳閒居賦云：防陵朱仲之李。李尤果賦云：三十六園朱李是也。中山有縹李，大如拳者，呼仙李。李尤果賦云：如拳之李。陸士衡果賦曰：仲山之縹李。又云：仙李縹而神，李紅。豫樟之爲木，豫樟卽木名也。生七年而後，與衆木有異。

漢武帝寶鼎二年，立豫樟宮於昆明池中，作豫樟水殿。

袁紹在冀州時，滿市黃金而無斗粟，餓者相食，人爲之語曰：虎豹之口不如饑人。劉備在荊州時，粟與金同價。

永嘉之亂，洛中饑荒，懷帝遣人觀市，珠玉金銀闐委市中，而無粟麥。袁宏表云：田畝由是坵墟，都市化爲珠玉，是也。

漢末大饑，江淮間童謠云：太岳如市，人死如林，持金易粟，貴於黃金。洛中童謠曰：雖有千黃金，無如我斗粟。斗粟自可飽，千金何所直。

耆舊說桓靈之世，汝潁間桑麻爲蒿莠，桃李不實，花而復落，落而復花，而官

倉有朽粟。

晉永嘉中梁州雨七旬。麥化爲飛蛾。

晉末荊州久雨。粟化爲蠱。蠱害民。春秋云穀之飛爲蠱是也。中郎王義興表奏曰。臣聞堯生神木而晉有蠱粟。陛下自以聖德何如。帝有慙色。

宋高祖之初年。當晉饑饉之後。卽位以來。江表二千餘里。野粟生焉。

古說淮南諸山生石穀。袁安云石穀藥名。穗之尤小者。

太原神金岡中有神農嘗藥之鼎存焉。

成陽山中有神農鞭藥處。一名神農原。藥草山。山上紫陽觀。世傳神農於此。

辨百藥中有千年龍腦。

冀州鵠山傳龍千年。則於山中蛻骨。今有龍岡。岡中出龍腦是也。

仙藥。紫鳳腦。千年鬪髓是也。

龜甲香。卽桂香之善者。

紫述香。一名紅蘭香。一名金桂香。亦名麝香草。出蒼梧桂林上郡界。今吳中。



有塵香草。香似紅藍而甚芳香。

南海山出千步香。佩之香聞於千步也。今海嶼有千步草。是其種也。葉似杜若而紅碧雜。貢籍曰南郡貢千步香。

香洲在朱崖郡。洲中出諸異香。往往不知名。千年松香。聞於十里。亦謂之十里香。

杏園洲在南海中。洲中多杏。海上人云仙人種杏處。漢時嘗有人舟行遇風泊此洲。五六日食杏。故免死。云洲中別有冬杏。

木蘭舟在潯陽江中。多木蘭樹。昔吳王闔閭植木蘭於此。用構宮殿也。七里洲中有魯班刻木蘭爲舟。舟至今在洲中。詩家云木蘭舟出於此。

天姥山南峰。昔魯班刻木爲鶴。一飛七百里。後放於北山西峰上。漢武帝使人往取。遂飛上南峰。往往天將雨。則翼翅搖動。若將奮飛。

魯班刻石爲九州圖。今在洛城石室山。

東北巖海畔有大石龜。俗云魯班所作。夏則入海。冬復止於山上。陸機詩云。

石龜尙懷海我寧亡故鄉。

上虞縣有石駝步。水際謂之步。

瓜步在吳中。吳人賣瓜於江畔。用以名焉。

吳江中又有魚步龜步。湘中有靈飛步。昉按吳楚間謂浦爲步。語之訛耳。公主山在華山中。漢末王莽秉政。南陽公主避亂。奔入此峰。學道。後得升仙。至今嶺上有一雙珠履。傳自公主。既於山中得道。駟馬王咸聞。追之不及。故留履以示之。潘安仁有公主峰記。

晉永嘉亂。既已至江。諸公主不得隨去。安陽公主奔入兩河界。悉爲民家妻。常快快不悅。有故鄉之思。村民感之。共築一臺以居之。謂之公主望鄉之館。至今歸然。王朗懷舊賦云。將軍出塞之臺。公主望鄉之館。將軍王潰戍邊。及帝崩。王莽篡逆。潰與莽有隙。遂留不遣還。因逃入胡中。士卒相率築臺爲望鄉之處。

曲阜縣南十里有孔子春秋臺。曲阜古城有顏回墓。墓上石楠縣樹二株。可

三四十圍。士人云。顏回手植。晉末羣盜蜂起。義陽公主自洛中出奔至洛南。士卒二千餘人。留守不去。以衛京都。劉曜攻破之。主有殊色。曜將逼之。主手刃曜不中。遂自刃。曜奇其節。遣葬之。立義陽公主墓。民憐之。爲立廟。今義陽神是也。

苻堅既爲姚萇所殺於新平佛寺中。後寺主摩訶蘭常夢堅曰。可爲吾作宮。既而寺左右民家死沒相繼。巫者常見堅怒曰。不吾宮。將盡殺新平民。因共改寺爲廟。遂無復災疾。每年正月二日。民競祀以大牢。新平寺。今苻家神也。今烏江長亭。亭下有駐馬塘。卽當是烏江亭長驪舟待項羽處。今陰陵故城九曲澤。澤中有項王村。卽項王迷失路處。項王失路於澤中。周回九曲。後人因以爲澤名。

燕昭王爲郭隗築台。今在幽州燕王故城中。土人呼爲賢士臺。亦謂之招賢臺。

漢武帝於湖中牧馬處。至今野草皆有嚼嚙之狀。湖中呼爲馬澤。澤中有武

帝彈碁方石石上勒銘存焉。

葳蕤草一名麗草。又呼爲女草。江浙中呼娃草。美女曰娃。故以爲名。

懸腸草一名思子蔓。南中呼爲離別草。

苔謂之澤葵。又名重錢。亦呼爲宜薺。南人呼爲妬草。

萱草一名紫萱。又呼爲忘憂草。吳中書生呼爲療愁花。嵇中散養生論云萱草忘憂。

舜草今之孝草也。

蓆具草一名塞路生。北方胡地。古詩云千里蓆具草。紅蘭花一名大草。

莪葵本胡中葵。似葵而大者。

寡草特生而不叢。

洛陽有支茜園。漢宮儀云。染園出芝茜。供染御服。是其處也。

紅綬花。蔓生如綬。一般有文采。因名焉。

甘泉宮有木園。武帝時園也。今俗呼爲仙草園。出漢魏宮志。

萋園在定陵。漢宮儀曰：萋園供染綠紋綬。小藍曰：萋。

稷音

芙蓉園在洛陽。漢家置之。長沙定王故宮有萋園。眞定王故園也。

張騫首蓂園。今在洛中。首蓂本胡中菜也。張騫始於西戎得之。

衛有淇園。出竹在淇水之上。詩云：瞻彼淇澳，綠竹猗猗。是也。

後漢李子長爲政，欲知囚情，以梧桐木爲之像囚形，穿地爲坎，臥木囚於其中，祝之。罪正者不動，寃者木囚動。時以爲精誠所應。子長時爲大理卿。

漢武宴於未央宮，忽聞人語云：老臣負罪自訴，不見其形。良久見架上老翁，長八九寸，面皺鬚白，拄杖僂步至前。帝問曰：叟何姓名？所訴者何？翁緣柱放杖叩頭不言，因仰視屋，俯視帝脚，忽不見。帝駭懼，問東方朔，朔曰：其名爲藻，兼水木之精也。陛下頃來頻興宮室，斬伐其居，故來訴耳。仰頭看屋而後視陛下脚足者，願陛下宮室足於此，不欲更造。帝乃息役。後帝幸瓠子河，聞水底有絃歌之聲，置肴膳芬芳於帝前。前梁上翁及數人，年少絳衣紫帶，佩纓皆長八寸，一人最長，長尺餘，凌波而出，衣不沾濕。或挾樂器，帝問之曰：向

所聞樂。是公等奏耶。對曰。臣前味死歸訴。蒙陛下息斤斧。得全其居。故相慶耳。遂奏樂。獻帝洞穴珠一枚。遂隱不見。帝問方朔。何謂洞穴珠。朔曰。河底有一穴。深數百丈。中有赤蚌。生此珠。徑寸明耀絕世。帝遂寶愛此珠。置於內庫。

燕昭王種長春樹。葉如蓮花。身似桂樹。花隨四時之色。春生碧花。春盡則落。夏生紅花。夏末則凋。秋生白花。秋殘則萎。冬生紫花。遇雪則謝。故號為長春樹。

澄永泉在滄州九視山。山下出泉。闊百餘步。亦名流永渠。雖泛金石。終不沉。故州人欲渡此泉。以瓦鐵為船舫。

地生毛。京房以為人勞之應。北齊武成河清年中。徐州及長安地生毛。長七尺。時北築長城。內築三臺。人苦勞役之應。

神泉出高密瑯琊郡。人或禱祈求之。則飛泉湧出。清冷而味甘。人或污之。則便竭。

鹽田在河東郡。有一大澤。澤中產鹽。引水沃之。則自成。號曰鹽田。取之無盡。不沃則無也。又張液有鹽池。自然生鹽。其鹽多少。隨月增減。

日林國有神藥數千種。其西南有石鏡。方數百里。光明朗澈。可鑒五臟六腑。亦名仙人鏡。國中人有疾。輒照其形。遂知病起何臟。府即采神藥餌之。無不愈。其國人壽三千歲。亦有長生者。

秦繆公時。陳倉人掘地得物。若羊非羊。似猪非猪。繆公道中逢二童子。曰。此名蠅。史記作蠅在地中食死人腦。若以松栢穿其首。則死。故今種栢在墓上。以防其害也。

辰州嵩溪有丹青樹。枝葉直上。籠雲下。無枝葉。上有五色葉。圓如華蓋。故號丹青樹。俗謂之五采樹。今在辰陽縣。

城陽縣城南有堯慶都墓。樹前一池。魚頭間有印文。謂之印頭魚。若非祀者。捕而不得。

奇肱國。其國人機巧。能爲飛車。從風遠行。湯時。西風吹奇肱人車。東至豫州。

界後十年而風復至。使遣歸國。去玉門四萬里。

東海有牛魚。其形如牛。海人採捕。剝其皮。懸之。潮水至。則尾起。潮落。則尾伏。顧渚山有櫛。汝取反子樹。其木如玉色。渚人採之。以爲杖。

蚺。一首兩身者。名曰肥遺。西華山中有也。見則大旱。南海有水蟲。名曰筋蚌。蛤之遺也。其小蟹。大如榆筴。筋開甲食。則蟹亦出食。筋合甲。蟹亦還入。爲筋取食。以終始。生死不相離。

漢武帝元鼎元年。起招靈閣。有一神女。留一玉釵。與帝。以賜趙婕妤。至昭帝元鳳中。宮人見此釵。光瑩甚異。共謀欲碎之。明視釵匣。唯見白燕。直升天去矣。後宮人常作玉釵。因名玉燕釵。

漢末關中大亂。有發漢時宮人塚者。宮人猶活。既出。平復如故。魏郭后愛念之。錄著宮人。常置左右。問漢時宮中事。說之。皆有次第。郭后崩。因哭泣過度。遂死。

周昭王時。塗修國獻青鳳丹鶴。各一雌一雄。



吳郡漁城城下水中有石首魚。至秋化爲鳧。鬼項中尙有石。

南康郡有君山。高秀重疊。有類臺榭。名曰女媧宮。有獸名格。似猩猩之形。自知吉凶。人無機愛之。則可馴狎。欲執害之。則去不來。

桂楊郡有銀井。鑿之轉深。漢有村人焦先。於半道見三老。褊身皓白。云。逐我太苦。今往他所。先知是怪。以刀斫之。三翁各以杖受刀。忽不見。視其斷杖。是銀。其井後遂不生銀也。

儋耳郡明山有二石。如人形。云。昔有兄弟二人。向海捕魚。因化爲石。因號兄弟石。

貞山在毘陵郡。梁時有村人韓文秀。見一鹿。產一女子。在地。遂收養之。及長。與凡女有異。遂爲女冠。梁武帝爲別立一觀。號曰鹿娘。後死。入棺。武帝致祭。開棺視之。但聞異香。不見骸骨。蓋尸解也。遂葬棺於毘陵。因號其葬處爲貞山。

江陰北有子英廟。子英卽野人也。善入水捕魚。得一赤鯉。將著家池中養之。

後長徑一丈有角翅。謂子英曰：我迎汝身，汝上我背，遂昇於天，為神仙。晉時人。

鶴鞋故解刺髀德宅耳則聽響遠，露眼赤精，則視遠。大毛落，麤毛生，其色如

雪。又云：高脚疎節，則多跛也。若百六十年，變止不食生物，千六百年形定，飲之而不食，與鳳為羣。

松有兩鬣，三鬣七鬣者，言如馬鬣形也。言粒者非矣。

人間三十六洞天，知名者十耳。餘二十六天，出九微志，不行於世也。

鯉魚滿三百六十鱗，蛟龍輒率而飛去。一年置一神守之，則不能去矣。神則龜也。

王僧辨嘗為荊南，得一蕃三十子，以獻梁元帝。

吳太皇時，朱休之家犬歌曰：言我不能歌，聽我歌梅花。今年故復可，明年當奈何。休遂殺其犬。明年休家人並死。

哀牢夷，西蜀國名也。其先有婦人捕魚水中，觸沉木有娠，生男子十人，沉木

爲龍。出水上。九男驚走。一兒不去。背龍。因舐之。後諸兒推爲哀牢王。

涿光山下。蠶水多鱮鱮之魚。如鵠而十翼。捕之可以禦火。

吳桓王時。會稽生五色瓜。吳中有五色瓜。歲充貢伏獻。

東南有桃都山。上有大樹。名曰桃都。枝相去三千里。上有天雞。日初出。照此木。天雞則鳴。天下鷄皆隨之鳴。

合塗國。去王都七萬里。人善服鳥獸。鷄犬皆使能言。

林屋洞。爲左神幽虛之天。卽天后真君之便闕。中有白紫芝泉。皆此洞所出也。乃神之飲餌。非常人之所得之。

日南郡。出果下牛。高三尺。漢樂浪郡。有果下馬。並高三尺。

廬陵。有木客鳥。大如鵠。千百爲羣。不與衆鳥相廁。俗云是古之木客花。化作廬陵。卽今吉州也。

後魏孝昌年中。有洛子淵。自云洛中人。戍於彭城。同營人樊元寶還。子淵附書至洛。書上題云宅上靈台。南延洛水。既至洛。忽逢一老翁。曰吾兒書也。引

入門館甚盛。呼坐命酒。酒至色赤甚香美。寶告退。老翁出送。但見高岸對水。無人家。及還彭城。子淵已失。元寶與子淵同成三年。不知是水神也。

彭城郡古徐國也。昔徐君宮人生一大卵。棄於野。徐有犬名後倉。啣歸。湯之卵開。內有一兒。有筋而無骨。後爲徐君。號曰偃王。爲政而行仁義。

湘州栖霞谷。昔有橋順二子。於此得仙。服飛龍一丸。十年不饑。故魏文詩曰。西山有仙童。不飲亦不食。卽此也。

河澗郡有聖姑祠。姓郝。字女君。魏青龍二年四月十日。與隣女樵采於滄深。二水處。忽有數人從水而出。若今之青衣。至女君前曰。東海使聘爲婦。故遣相迎。因數茵於水上。請女君於上坐。青衣者侍側。順流而下。其家大小奔到岸側。惟泣望而已。女君怡然曰。今幸得爲水仙。願勿憂。語訖。風起而沒於水。中鄉人因爲立祠。又置東海公像於聖姑側。呼爲姑夫。

大翻山小翻山在媯州。昔有王次仲年少入學。而家遠。常先到。其師怪之。謂其不歸。使人候之。又實歸在其家。同學者常見仲促一小木。長三尺餘。至則

著尾間欲共取之輒尋不見及年弱冠變蒼頡舊字爲隸書秦始皇遣使徵之不至始皇怒檻車囚之赴國路次化爲大鳥出車而飛去至西山乃落二翻一大一小遂名其落處爲大小翻山媯州卽今幽州之地

利州義城郡葭萌縣有玉女房蓋是一大石穴也昔有玉女入此石穴前有竹數莖下有青石壇每因風自掃此壇玉女每遇明月夜卽出於壇上閒步徘徊復入此房

龍巢山下有丹水水中有丹魚欲捕其魚伺魚之浮出水有赤光如火網取割其血塗足可涉水如履平地

宋武帝大明五年廣郡獻白孔雀以爲中瑞

秦惠王獻五美女於蜀王王遣五丁迎女乃見大蛇入山穴中五丁曳蛇山崩五女上山遂化爲石

一說少空山有貝多樹與衆木有異一年三放花其花白色香美俗云漢世野人將子種於此

武都丈夫化爲女子。顏色美麗。蓋山之精也。蜀王娶以爲妻。無幾物故。遂葬於成都郭中。以石鏡一枚。長二丈。高五尺。同葬之。

衡州九疑山。有舜廟。郡守至官。常致敬修祀。則空中如有弦歌之聲。一說九疑山隔湘江。跨蒼梧野。連營道縣界。九山相似。行者望之。有疑。因名曰九疑山。

漢惠帝七年。夏雷震南山。林木皆自火。燃至根。其地悉皆焦黃。後其雨迅過。人就其間。得龍骨一具。

晉世。顏舍嫂病。須與蚺蚺膽療之。則愈。既不能得。舍憂嘆累日。忽有一童子。持青囊授舍。乃曰。真蚺膽也。童子遂化爲青鳥飛去。

陽羨縣小吏吳合龍。家在溪南。偶一日。以掘頭船過水溪內。忽見一五色浮石龕。遂取歸。置於床頭。至夜化爲一女子。至曙。仍是石。後復投於本溪。

南海中有鮫人室。水居如魚。不廢機織。其眼能泣。則出珠。晉木元虛海賦云。天琛水怪。鮫人之室。

夜郎縣者其南遠夷國名也。其先有女子浣紗。忽三節竹流入足間。聞其中有號聲。剖竹視之。得一男。歸而養之。及長。有武略。自立爲夜郎侯。以竹爲姓。漢武帝元鼎六年。征西南夷。改爲牂柯郡。夜郎侯迎降。天子賜以玉印綬。後卒。夷獠盛以竹。王非血氣所生。衆爲立廟。今夜郎縣有竹王神是也。

右任昉述異記二卷。晁氏云。昉家藏書三萬卷。天監中采輯前世之事。纂述新異。爲此記。皆時所未聞。特以資後來屬文之用。亦博物之意。唐志以爲祖冲所作。非也。今考隋唐志。並載祖冲之述異記十卷。無任昉記。而藝文類聚。太平御覽等書。所引祖記。又往往爲今本任記所無。或者任祖二人當時各自有記。而隋唐志或偶失載也。南史本傳亦載昉撰雜傳二百四十七卷。不及此記。豈卽在雜傳中歟。今叢書本較稗海本又不全。中多唐時州名。則此書又經唐人改竄。非原本也。汝上王謨識。